



ՀԵՌՈՒՍՏԱՏԵՍՈՒԹՅԱՆ ԵՎ ՌԱԴԻՈՅԻ ՀԱՆՁՆԱԺՈՂՈՎ

ՈՐՈՇՈՒՄ

16 ապրիլի 2026 թվականի թիվ 39-Ա

ք. Երևան

«ԱՅ-ՆԵՏ» ՍՊԸ ՆԿԵՐՈՒԹՅԱՆ ՆԿԱՏՄԱՄԲ ՀԱՐՈՒՑՎԱԾ ՎԱՐՉԱԿԱՆ ՎԱՐՈՒՅԹԸ ԿԱՐՃԵԼՈՒ ՄԱՍԻՆ

Հեռուստատեսության և ռադիոյի հանձնաժողովը (այսուհետ նաև՝ Հանձնաժողով), ուսումնասիրելով 2026 թվականի մարտի 24-ին իր նախաձեռնությամբ հարուցված թիվ 8 վարչական վարույթի նյութերը, *պարզեց*.

Հանձնաժողովի կողմից «Տեսալսողական մեդիայի մասին» օրենքով (այսուհետ նաև՝ Օրենք) իրեն վերապահված վերահսկողական գործառնություններն իրականացնելիս արձանագրվել են «ԱՅ-ՆԵՏ» ՍՊԸ ընկերության (այսուհետ նաև՝ ցանցային օպերատոր կամ Ընկերություն) կողմից առանց համապատասխան իրավական հիմքերի՝ պայմանագրերի, տեսալսողական ծրագրերը վերահաղորդելու Օրենքի դրույթների պահանջի առերևույթ խախտման հատկանիշներ:

Հանձնաժողովը, հիմք ընդունելով Հանձնաժողովի նախագահի 2026 թվականի մարտի 19-ի թիվ 12-Ա հրամանի հիման վրա օպերատորների գործունեության տեղում դիտարկման արդյունքների վերաբերյալ 2026 թվականի մարտի 24-ին կազմված արձանագրությունը (այսուհետ նաև՝ Արձանագրություն) և ղեկավարվելով «Վարչարարության հիմունքների և վարչական վարույթի մասին» օրենքի 30-րդ հոդվածի 1-ին մասի բ) կետով, 2026 թվականի մարտի 24-ին ցանցային օպերատորի նկատմամբ հարուցել է թիվ 8 վարչական վարույթը:

Համաձայն Օրենքի 42-րդ հոդվածի 18-րդ մասի՝ Արձանագրությունը կարող է հիմք հանդիսանալ վարչական վարույթ հարուցելու համար, իսկ հարուցված վարչական վարույթի շրջանակներում ծառայել որպես ապացույց:

Արձանագրությանը ծանոթացել և այն տեղում ստորագրել է ցանցային օպերատորի ներկայացուցիչը՝ «ԱՅ-ՆԵՏ» ՍՊԸ ընկերության տնօրեն Դավիթ Աբրահամյանը և վերջինիս վերաբերյալ առարկություններ չի հայտնել:

Ըստ Արձանագրության՝ «ԱՅ-ՆԵՏ» ՍՊԸ ընկերության կողմից վերահաղորդվող տեսալսողական ծրագրերի դիտարկման արդյունքում պարզվել է, որ ցանցային օպերատորի կողմից վերահաղորդվում են հետևյալ տեսալսողական ծրագրերը՝

«Շեն», «Հ2», «ABN», «Ազատություն», «Рен-ТВ», «РБК», «Авто Плюс», «Նոյան Տապան», «Телекафе», «5-ый канал», «Домашний», «СТС», «ТВ-3», «Карусель», «Кинохит», «Индийское Кино», «Шансон ТВ», «Музыка Первого», «FON music», «Bridge Русский Хит», «Bridge hits», «СТС Kids», «Nickelodeon», «Мир 24», «National Geographic», «ТНТ4», «Перец», «Иллюзион+», «Кухня», «Fox», «Bridge TV», «ІZ», «Муз», «Bridge Deluxe», «ТНТ», «Пятница! Int», «Детский Мир», «365», «Киномикс», «Киносемья», «Киносерия», «Дом Кино», «Кинокомедия»,

«Мужское Кино», «Кто Есть Кто», «Любимое Кино», «Animal Planet», «Discovery», «Fashion TV», «TLC» և «Eurosport 1»:

Հանձնաժողովի ծրագրերի մոնիտորինգի և վերահսկողության վարչության կողմից իրականացվել է Ընկերության գործունեության մշտադիտարկման արդյունքների Արձանագրությունում նշված վերահաղորդվող տեսալսողական ծրագրերի և ցանցային օպերատորի կողմից Հանձնաժողով ներկայացված վերահաղորդվող տեսալսողական ծրագրերի ցանկի համադրություն, որի արդյունքում պարզվել է, որ «ԱՅ-ՆԵՏ» ՍՊ ընկերության կողմից ներկայացված վերահաղորդվող տեսալսողական ծրագրերի ցանկում, բացի փաստացի վերահաղորդվող ծրագրերից, առկա են նաև «Food Network», «Звезда», «Охотник и рыболов», «BABY TIME», «BRIDGE TV Classic», «BRIDGE TV Шлягер» և «BRIDGE TV фреаш» տեսալսողական ծրագրերը, որոնք Արձանագրությունը կազմելու պահին չեն վերահաղորդվել, ինչն արգելված չէ օրենքով և չի խախտում այլոց իրավունքները:

Միաժամանակ պարզվել է, որ «ԱՅ-ՆԵՏ» ՍՊ ընկերության կողմից ներկայացված վերահաղորդվող տեսալսողական ծրագրերի ցանկում առկա չէ «Շեմ» տեսալսողական ծրագիրը, որը փաստացի վերահաղորդվել է Արձանագրությունը կազմելու պահին:

Վերոնշյալը պարունակում է Օրենքի 49-րդ հոդվածի 1-ին և 5-րդ մասերով սահմանված պահանջների առերևույթ խախտման հատկանիշներ:

Հանձնաժողովը հարուցված վարչական վարույթի մասին 25.03.2026թ. թիվ Ե/04/04.1/220-26 գրությամբ ծանուցել է ցանցային օպերատորին և հայտնել, որ այս հարցի վերաբերյալ կարող են ներկայացնել իրենց պարզաբանումները և բացատրությունները:

Ցանցային օպերատորը վերոնշյալ գրությանն ի պատասխան 09.04.2026թ. վարչական վարույթի վերաբերյալ ներկայացրել է բացատրություններ, որով հայտնել է, որ

«(...) «Շեմ» տեսալսողական ծրագրի վերահաղորդումն իրականացվում է օրինական հիմքերով: Ընկերությունը դեռևս 2026 թվականի հունվարի 12-ին կնքել է վերահաղորդման պայմանագիր «ՍԻԼՈՒԵՏ ՍՏՈՒԴԻՈ» ՍՊ ընկերության հետ, որը հանդիսանում է նշված տեսալսողական ծրագրի իրավատերը:

Ծանուցման մեջ նշված անհամապատասխանությունը հետևանք է տեխնիկական շփոթմունքի և վերաբեռնողավորման գործընթացի: Նախկինում հանրությանը հայտնի «Շողակաթ» ընկերությունը 2026 թվականից հանդես է գալիս նոր իրավաբանական անձի («ՍԻԼՈՒԵՏ ՍՏՈՒԴԻՈ» ՍՊԸ) և «Շեմ» անվանման ներքո: Մշտադիտարկման արձանագրության կազմման պահին ցանկում «Շեմ» անվան բացակայությունը պայմանավորված է եղել բացառապես տեխնիկական վրիպակով, այլ ոչ թե պայմանագրի կամ թույլտվության բացակայությամբ:

Հաշվի առնելով, որ վերահաղորդումն իրականացվել է գործող և օրինական պայմանագրի հիման վրա, խնդրում եմ հաշվի առնել սույն պարզաբանումը և կարճել հարուցված թիվ 8 վարչական վարույթը՝ օրինախախտման բացակայության հիմքով:»:

Վերոնշյալ բացատրություններին կից ցանցային օպերատորը ներկայացրել է նաև «ԱՅ-ՆԵՏ» ՍՊԸ և «ՍԻԼՈՒԵՏ ՍՏՈՒԴԻՈ» ՍՊ ընկերության միջև 12.01.2026թ. կնքված պայմանագրի պատճենը և վերահաղորդվող տեսալսողական ծրագրերի թարմացված ցանկը:

Հանձնաժողովի հիմնավորումները (պարճառաբանությունը) և եզրահանգումը.

Վարչական վարույթի բազմակողմանի, լրիվ և օբյեկտիվ քննության, ձեռք բերված ապացույցների ուսումնասիրության և գնահատման արդյունքում Հանձնաժողովն արձանագրում է.

Օրենքի 2-րդ հոդվածի 1-ին մասը սահմանում է.

«Հայաստանի Հանրապետության տեսալսողական մեդիայի մասին օրենսդրությունը ներառում է Հայաստանի Հանրապետության Սահմանադրությունը, սույն օրենքը, «Զանգվածային լրատվության մասին», «Էլեկտրոնային հաղորդակցության մասին», «Հեղինակային իրավունքի և հարակից իրավունքների մասին», «Լեզվի մասին», «Գովազդի մասին» օրենքները, Հայաստանի Հանրապետության ընտրական օրենսգիրքը, կարգավորող պետական մարմնի իրավական ակտերը, տեսալսողական մեդիայի ոլորտը կարգավորող այլ իրավական ակտեր և Հայաստանի Հանրապետության միջազգային պայմանագրերը»:

Օրենքի 32-րդ հոդվածի 1-ին մասի 14-րդ կետի համաձայն՝ Հանձնաժողովը իրականացնում է Հեռարձակողների և օպերատորների գործունեության մշտադիտարկում:

Օրենքի 42-րդ հոդվածի 1-ին մասի համաձայն՝ Հեռարձակողների գործունեության մշտադիտարկումն իրականացվում է ուղղակի դիտարկման, իսկ օպերատորի դեպքում՝ նաև տեղում դիտարկում իրականացնելու միջոցով, իսկ նույն հոդվածի 8-րդ, 9-րդ և 11-րդ մասերը սահմանում են.

«8. Մշտադիտարկման արդյունքներով կարգավորող պետական մարմնի ներկայացուցիչը մշտադիտարկման արդյունքների վերաբերյալ կազմում է արձանագրություն:

9. Մշտադիտարկման արդյունքների վերաբերյալ արձանագրության մեջ նշվում են մշտադիտարկման արդյունքների համառոտ շարադրանքը, ինչպես նաև վարչական վարույթ հարուցելու կամ հարուցված վարչական վարույթի համար էական նշանակություն ունեցող բոլոր փաստական հանգամանքները, այդ թվում՝ վարույթի մասնակիցների օգտին առկա հանգամանքները:

11. Մշտադիտարկման արդյունքների մասին արձանագրությունն ուղղակի դիտարկում իրականացնելու դեպքում ստորագրում է մշտադիտարկում իրականացրած անձը, իսկ օպերատորի մոտ տեղում դիտարկում իրականացնելու դեպքում ստորագրում է կարգավորող պետական մարմնի և օպերատորի ներկայացուցիչը»:

Օրենքի 49-րդ հոդվածի 1-ին և 5-րդ մասերը սահմանում են.

«1. Հայաստանի Հանրապետության տարածքում և նրա սահմաններից դուրս գործող Հեռարձակողների տեսալսողական ծրագրերը ցանցային օպերատորի լիցենզիա ստացած անձի կողմից կարող են վերահաղորդվել տեսալսողական ծրագրերի դիստրիբյուտորի կամ հեռարձակողի հետ պայմանագրի հիման վրա:

5. Վերահաղորդվող տեսալսողական ծրագրերի յուրաքանչյուր փոփոխության վերաբերյալ ցանցային օպերատորը տեղեկացնում է կարգավորող պետական մարմնին»:

Օրենքի 60-րդ հոդվածի 8-րդ մասի համաձայն՝ սույն օրենքն ուժի մեջ մտնելուց հետո ցանցային օպերատորները կարգավորող պետական մարմնին տեղեկություն են ներկայացնում իրենց ցանցում վերահաղորդվող տեսալսողական ծրագրերի մասին:

«Հեղինակային իրավունքի և հարակից իրավունքների մասին» օրենքի 39-րդ հոդվածի 1-ին մասի համաձայն՝ այլ անձինք ստեղծագործությունը կարող են օգտագործել միայն ստեղծագործության նկատմամբ գույքային իրավունքները կրող անձի (ստեղծագործության հեղինակ կամ այլ անձ, որին այդ իրավունքներն անցել են օրենքով սահմանված կարգով, այսուհետ՝ իրավատեր) թույլտվությամբ՝ հեղինակային պայմանագրի հիման վրա, եթե սույն օրենքով այլ բան նախատեսված չէ:

Նույն օրենքի 65-րդ հոդվածի 1-ին մասի համաձայն՝ սույն օրենքով պահպանվող ստեղծագործության կամ դրա էական մասի կամ հարակից իրավունքների օբյեկտի ցանկացած օգտագործում անօրինական է, եթե նախապես, մինչև նման օգտագործումը ձեռք չի բերվել հեղինակային իրավունքի կամ հարակից իրավունքների իրավատիրոջ թույլտվությունը:

Հանձնաժողովի կողմից ուսումնասիրվել են վարչական վարույթի վերաբերյալ ցանցային օպերատորի կողմից ներկայացված բացատրությունները և դրանց կից փաստաթղթերը:

Ուսումնասիրությունից պարզ է դարձել, որ «ԱՅ-ՆԵՏ» ՍՊԸ և «ՍԻԼՈՒԵՏ ՍՏՈՒԴԻՈ» ՍՊ ընկերության միջև 12.01.2026թ. կնքված պայմանագրի համաձայն՝ ցանցային օպերատորն իրավունք ունի վերահաղորդել «ՇԵՄ» տեսալսողական ծրագիրը:

Վերոգրյալից պարզ է դառնում, որ ցանցային օպերատորը չի խախտել Օրենքի դրույթները, և տեսալսողական ծրագիրը վերահաղորդվել է համապատասխան պայմանագրի հիման վրա:

Քննարկվող համատեքստում հատկանշական է, որ ցանցային օպերատորը 2021 թվականից հանդիսանում է Հանձնաժողովի կողմից լիցենզավորված իրավաբանական անձ (սփուման տարածքը՝ ք. Երևան, լիցենզիայի գործողության ժամկետը՝ 22.07.2021թ.- 22.07.2031թ., սերիան և համարը՝ ԿՀ N 318):

Այսպիսով, հաշվի առնելով այն փաստը, որ ցանցային օպերատորը «ՇԵՄ» տեսալսողական ծրագիրը վերահաղորդել է համապատասխան իրավունքը հավաստող փաստաթղթի՝ պայմանագրի առկայությամբ՝ ուստի վարչական վարույթի բազմակողմանի, լրիվ և օբյեկտիվ քննությամբ, ձեռք բերված ապացույցների ուսումնասիրության և գնահատման արդյունքում Հանձնաժողովն արձանագրում է, որ վարչական իրավախախտման դեպքի կամ կազմի բացակայության հիմքով ցանցային օպերատորի նկատմամբ 24.03.2026թ. հարուցված թիվ 8 վարչական վարույթը ենթակա է կարճման:

«Վարչական իրավախախտումների վերաբերյալ» օրենսգրքի 247-րդ հոդվածի 1-ին կետով սահմանված է՝ վարչական իրավախախտման վերաբերյալ գործի վարույթը չի կարող սկսվել, իսկ սկսվածը ենթակա է կարճման հետևյալ հանգամանքների առկայության դեպքում՝

1) վարչական իրավախախտման դեպքի կամ կազմի բացակայությունը:

«Վարչական իրավախախտումների վերաբերյալ» օրենսգրքի 282-րդ հոդվածի համաձայն՝ քննելով վարչական իրավախախտման վերաբերյալ գործը, մարմինը (պաշտոնատար անձը) ընդունում է հետևյալ որոշումներից մեկը՝

1) վարչական տույժ նշանակելու մասին.

2) գործի վարույթը կարճելու մասին:

Գործի վարույթը կարճելու մասին որոշում ընդունվում է բանավոր դիտողություն հայտարարելու, նյութերը ընկերական դատարանի, ձեռնարկությունում, հիմնարկում, կազմակերպությունում և դրանց կառուցվածքային ստորաբաժանումներում ստեղծված հարբեցողության դեմ պայքարի հանձնաժողովի, հասարակական կազմակերպության կամ աշխատավորական կոլեկտիվի քննությանը հանձնելու կամ դատախազին, նախաքննության կամ հետաքննության մարմնին հանձնելու դեպքում, ինչպես նաև սույն օրենսգրքի 247 հոդվածով նախատեսված հանգամանքների առկայության դեպքում:

Ելնելով վերոգրյալից և ղեկավարվելով «Տեսալսողական մեդիայի մասին» օրենքի 10-րդ հոդվածի 3-րդ մասով, «Հեղինակային իրավունքի և հարակից իրավունքների մասին» օրենքի 65-րդ հոդվածի 1-ին մասով և հիմք ընդունելով «Վարչական իրավախախտումների վերաբերյալ» ՀՀ օրենսգրքի 247-րդ հոդվածի 1-ին կետի, 282-րդ հոդվածի դրույթները՝ Հեռուստատեսության և ռադիոյի հանձնաժողովը

Ո Ր Ո Շ Ե Ց

1. «ԱՅ-ՆԵՏ» ՍՊ ընկերության նկատմամբ 24.03.2026թ. հարուցված թիվ 8 վարչական վարույթը կարճել:

2. Սույն որոշումն ուժի մեջ է մտնում այն «ԱՅ-ՆԵՏ» ՍՊ ընկերությանը պատշաճ ձևով հանձնելու օրվան հաջորդող օրվանից:

3. Սույն որոշումն ուժի մեջ մտնելու պահից երկամսյա ժամկետում կարող է բողոքարկվել Հեռուստատեսության և ռադիոյի հանձնաժողով կամ ՀՀ վարչական դատարան:

**ՀԵՌՈՒՍՏԱՏԵՍՈՒԹՅԱՆ ԵՎ ՌԱԴԻՈՅԻ
ՀԱՆՁՆԱԺՈՂՈՎԻ ՆԱԽԱԳԱՀ**

Տ. ՀԱԿՈԲՅԱՆ

2026թ. ապրիլի 16
ք.Երևան